

671.1238
078
129

卷六十三列傳十五
文學上 卷六十四
列傳六文學下 卷
六十五列傳七忠烈

永平府志

永平府志卷六十三

列傳五

文學上

後魏

衛冀隆遼西人官國子博士爲服氏之學上書難杜氏

春秋六十三事

金

王元粹字子正初名元亮後止名粹平州人系出遼世衣冠家年十八九作詩便有高趣性習專固世事不以累其業故時輩無能當之者正大末用門資敘爲南陽酒官遭難流寓襄陽襄陽破隻身北歸寄食燕

中遂爲黃冠師有十月風霜侵病骨數家鍼綫補殘
衣之句親舊有憐其孤苦欲爲之更娶者子正業已
高舉主太極道院竟不能自返年四十餘癸卯九月
病卒詩人淄川楊叔能輓之云匹婦主中饋雖貧生
理存五言造平淡隻影臥黃昏謾下陳蕃榻虛沾文
舉尊北平家世絕銜恨入荒原從弟鬱亦攻詩方之
其兄蓋商周矣鬱字飛伯少日作樂府擬古別離有
黃鶴樓高雲不飛鸚鵡洲寒星已曙之句人多傳之
其後入京師大爲李欽叔所稱與之詩云詩句媲國
風下者猶楚亂贈詩者甚多有云憶昔潁亭見飛伯

恍若夢中逢李白又云紫陁仙人今淵雲騎風御氣
七尺身又云良金原有價白璧况無瑕又云王郎少
年詩境新氣象慘澹含古春筆頭仙語復鬼語只有

溫李無他人飛伯用是頗自貴重云

中州集案甘水
仙源錄云恕齋

先生姓王氏名粹字子正北平之巨族也才高而學
瞻少有詩名每一詠出膾炙人口然與世疎闊不事
舉業正大閒薄遊鄴下漂泊江漢閒甲午還至燕遇
真常大宗師卽北面事之執弟子禮居長春宮之萃
斗堂年四十餘以癸卯九月無疾而逝不浹旬而見
夢於誠明張君其云爲款曲不異平昔少焉作詩而
別云當時每恨花開早及看花開花已老花開花落
能幾何回頭又見春光好詰旦誠明書見夢之詩白
於真常真常歎曰子正仙矣聞者異之先生性恬澹
無機構廉潔貞介與人交悉待之以誠聞有道行者
雖窮居陋巷必親之嗜讀書作文尤
長於詩其古詩雖淡有陶韋之風焉

邢具瞻字巖夫遼西人天會二年進士與吳蔡爲文章

友仕至翰林待制中州集載其一詩出塞云樓外青

山半夕陽寒鴉翻墨點林霜平沙細草三千里一笛

西風人斷腸

中州集

李杭樂亭人天會初舉進士時平灤兵戈甫定民未知
學杭擇地建文廟行釋奠禮以振興學校維持風俗
爲己任仕至州刺史有聲於時

鮮于仲權其先遼東人遠祖輔仕魏任漁陽太守有功
封亭侯後還本鎮子孫世居漁陽北平間仲權世居
樂亭少博學工古文登明昌閒進士先是文廟創自

天會無黷舍規模粗具仲權慨然謀鼎建邑人相勸
興置學館邑之人物稱盛自茲始仲權爲人重道義
有節概弟仲畢官昭信校尉

齊守信陶之後也業詞賦舉鄉進士未仕卒兄守澤弟
守素守約守澤官昭信校尉守素鄉進士守約明經
教訓鄉里

裴宗智號秀巖居士明昌閒人善書篆張守謙號天倪
老人貞祐閒人俱居樂亭善屬文並隱居不仕有古
逸民風

張介字介甫平州人正大元年經義進士第一爲國用

安參議用安表請用安幸山東上以其言示宰臣宰

臣奏用安反復本無匡復志此必參議張介等爲之

業已遷蔡議遂寢

金史附國用安傳案中州集作彭城人歷鞏穀熟三縣令幼有賦聲

爲人有蘊藉嘗贈詩人楊叔能末章云我貧自救如沃焦君來過我亦何聊爲君欲寫貧士歎才思殊減

荒村謠楊初以荒村謠得名故云

元

楊紹先樂亭人中統三年進士至元中授集賢院司直

學士德行文章爲世推重嘗捐書三百六十三部於

本縣學備邑弟子員及民間俊秀諷誦子塾仕至濟

南路厭次縣尹善篆書不墜家聲見邑廟學碑

案灤州志

載至元二十六年紹先捐書學正秦本有
記延祐三年子有道捐田學正張德有記

明

宋宏道樂亭人少值元季隱居不仕講授鄉里家業泊
如恬不爲意後明興設科登洪武乙丑進士拜監察
御史有聲尋遷河南左參政以衰老乞歸琴書衣裝
惟一輓輅而已後起左僉都御史未就年七十餘卒
於家

郁瑄其先崑山人祖彥忠明初仕潮州府同知徙樂亭
父昌歲貢生瑄勤學力行天順壬午領鄉薦任知縣
仲子昕歲貢生任陵縣季子時歲貢任儀封教諭時

子從舜聰敏好學聲名藉甚歲貢授訓導一門絃誦
人以爲難云

蕭雲漢樂亭人富長子博學工古文詞貢入太學授大
同府通判膺薦舉陞河東運同遂乞歸居鄉以文史
自娛邑之銘碣多出其手子馨春任濬縣訓導發春
任磁州訓導達春任芮城主簿

白應庚字象先灤州人原名培極年數歲出口成古文
辭十一歲入泮院試以冠軍食餼歲丙戌中鄉試益
肆力於典墳書學二王所著詩文咸爲人取去後夢
有人告之曰子欲爲天榜第一人則盍更名爲應庚

乎寤卽更之未幾壬寅九月年三十六無疾而卒卒
時時日皆庚辰說者謂庚應爲天上第一人云

鄭卿字省吾灤州鄉進士齒時稽古弗怠筮仕河南府
判懸魚酌水衙齋閑寂與名彥彈琴賦詩而已抗疏
歸里力辭徵聘所著有省吾詩文集藏於家

李充桂字攀之號月樵灤州人天姿醇亮下筆千言凡
三試棘闈輒奇於數由明經訓獲鹿再諭鹽山士欽
蘇湖之教焉

劉景周字憲之號鳴岐盧龍人廩生幼穎異篤孝行性
沈默博研今古教子義方後猝夢緋衣奉詔內記一

聯云玉碎白猶在松枯節更堅未百日卒年五十四
著易義心解三卷詩文諸稿存於家

許莊字德徵灤州人登宏治癸丑進士知臨汾寶雞二
縣俱有聲遷平陽同知纂修孝宗實錄及三十二郡
志特委編著陞山東僉事又遣分巡遼海上安遼十
四策擢陝西參議調山西糧儲以安邊四事上言武
宗不報遂乞休埽軌著述有康衢文集一百卷梅花
百詠一卷心鑑警語一卷先天方輿圖說一卷三禮
儀注四卷

馮斗華字應垣灤州人萬厯丁酉舉人任長山令政尙

簡約公餘與學博諸生橫經問字句公文者相望以
清直忤直指罷歸讀書不置所著有經書解義平平
言二集以子運泰貴累封大中大夫太僕卿

張詩字子言別號崑崙山人盧龍衛民李氏子十歲避
僉丁隨父母逃京師衡州同知張公抱以爲子張歿
後訪盧龍得諸從兄弟哭諸祖父墓衡州卒乏嗣仍
子之初學舉子業於呂柟繼學詩文於何景明聲名
藉藉長安會府試士士當自負凡入試詩使其家童
代之試官不許遂拂衣出一意爲詩徧遊天下名勝
與諸名人倡和時稱燕山豪士至汝南視何景明疾

守七月景明卒還北平所居一畝之宅擇隙地種竹
每遇風雨飄瀟披襟流盼相對欣然命酌杭守李士
行稱其不狂不屈不惰不驕春風不足融其情醇醪
不足味其況爲文雄奇變怪覽者不敢以今人待之
所著有罵鬼詰髮笑琳七子等文善行草得旭顛素
師遺意岳氏雨華編以崑崙爲首云

高濂字雲沖擢之士官生任宗人府經歷濂本世胄絕
無執穀習氣餐經味道攻苦甚儒生性蘊藉雖田夫
乞句亦深愛敬事繼母庶母皆中禮有詩一卷行於
世子階亦能讀父書時人比之太邱彥方云任山西

鹽運司副使晉開封周王相清望益著

張汝能字敷四灤州人事兄如父推產於幼弟訓戒諸生酷嗜詩古文詞門人王仲默嘗言奇字之學久無折質先生自蟲文鳥篆盡海彙諸書所載怪異不經見者罔弗詳其反切字義可謂博矣嗣文燦中副車王仲默中丞鎬之曾孫灤諸生也風度秀挺齟年輒喜爲詩文瘦媚若清蟬古木筆力超邁迥出人上善小楷自鐫石章細勁同漢琢沒後郡人醵金刊其遺稿

國朝

崔巍字嶽生居遷安其先盧龍人幼孤崇正庚午郡城

陷母王氏度不能免自經依兄嫂避難兄嫂利其產
百計死之賴母叔王如梅收養之王業農弗令就學
年逾冠里胥欲派以役巍恥之遂發憤力學入遷安
庠益攻苦徧涉經史繭足走京師受春秋於歸安尹
平之先生領順治丁酉鄉薦選武邑教諭修學舍課
生徒鐸聲丕振留心心理學議論一宗紫陽時講學者
多排詆陽明巍曰致知之學孔孟真宗且陽明先生
直諫勤王功在社稷眞以身講學者若隨俗以異端
斥之不但得罪陽明亦紫陽所不許也年四十八卒
子三璠拔貢生璵庠生璨自有傳

吉民字君祝灤州人性澹泊不慕榮祿以春秋名時應
制舉兩置乙卷遂絕意進取鼎革後當鄉貢邑令促
之不就家貧常閉戶靜坐生平無喜慍色手註孝經
五載始就尋卒嘗曰我夫子志在春秋行在孝經我
註唯知經者知我此實語也

李集鳳字翽升山海衛人友松次子幼入邑庠年十五
食廩餼順治十二年拔貢生授洛陽縣丞丞故卑位
毋得專民事守若令有以事委者集鳳聽斷明允以
廉幹稱性端嚴淹通羣籍凡濂洛關閩之書無不究
悉尤善春秋彙先儒註解討辨詳核厯三十年凡四

易橐然後成凡六十五卷名曰春秋集解辨疑汪檢
討輯出守河南府雅重其書新城王尙書士正亦稱
其研精三傳下吏之有經學者卒於官洛陽人請從
祀周公廟康熙五十三年本籍崇祀鄉賢

趙御眾字寬夫灤州人明季汀州府同知申寵長子也
順治十七年與盧龍韓鼎業王埏從容城孫夏峯學
函丈之間追隨二十餘年與及門諸子往復辨難皆
入道之言夏峯懷友詩云寬夫善補過力爲明學地
又答寬夫書云天地閒只有這件事無精粗大小內
外之言會得此無處非這件事聖賢隨人指點總之